

巢经巢全集

第五
册

播雅卷第二十二

遵義鄭 珍子尹編輯

遵義唐樹義子方校訂

張國子雲藻三首

雲藻字霽嵐自信于國子監生

送黃愛廬樂之大守觀察浙東

紛淚灑江濱神君別播人士思文節教民歎次翁貧餘惠孤孩飽留書志乘新

公於郡署右建養幼堂復修緝府志四十八卷

海氛方待戢無計挽征輪

時嘆夷未靖

送平樾峯太守去任

傾談化術座生風止為肥民瘦厥躬

公體清瘦

治理劇繁偏整暇清廉官吏總貧窮

二千石米分孩幼

公辦建養幼堂工未就所收諸孩先捐廉俸養之

三百篇詩啓瞶矇

公喜作詩暇即拈毫吟詠

四

野甘棠勞憩爰不須今始護蔥蔥

公意製一竹兜時昇巡縣卹市自丙申冬蒞住至己亥春以失察仁懷方家溝賊降知縣

留黔凡在官二年中斷新舊案四千餘去日無留牘郡中惡子厲衿自答杖外躬
摘發七十七人當厥罪捐增湘川培英啓秀三書院膏火詳淮前守陳玉鑒正安
吏目徐階平入祀名宦祠鄉先
生唐廉祀鄉賢祠美不勝紀

統如五鼓促征程琴鶴依然一擔輕戶裊花枝沿路拜兒騎竹馬擁車行韋丹
此日碑爭勒藥社前時像早成從此湘江流澤永止應名子不離平

唐秀才成杰三首

成杰字瑋人源洪子諸生瑋人耿介不諧於俗家有薄地率其弟躬耕
兼教讀以食歲惟祀先人炊米日率拌莠麥之屬供饗殮嚴冬單衣無
二襲貧至於此而不稍干人居郡西鴨溪場側余昔往省先墓常主於
其家瑋人不以余故異飯每鷄鳴與家人皆起瑋人則沙瓶煎茶酌薦
象明介石敬亭肇江數公遺像旋持烟草就其母像燒欲盡乃已語余
吾母生前如是不忍忘也其諸子被薄畏寒常起環爐暗坐誦晝所讀
書晨倍常不差一字而猶怒瞋不熟自親俱亡卽不就鄉試曰得之無

榮祿之無用更何試爲余於里中知交獨歎瑋人行事不可及道光丁酉余遊滇歸瑋人乃以前年夏死矣鬼神茫昧信有不可解者耶平生不多作詩今就存篋錄三首其人固不以此重也

鄭子尹過舍

君但來西里人思作主人却偏投舍宿似未覺余貧就地堪爲榻捐錢代買春自憐非此客誰復冒相親

丙申正月子尹來舍道其歸卽赴滇贈別二首

子有兩親在而爲千里遊不知書劍去今歲得歸不
今夕故人宅明月羅山城相逢知隔歲蘆酒且深更

陳秀才謨 四首

謨字笏書遵義人諸生笏書能文善畫屢躋秋闈意緒牢落因縱情於酒鬱鬱以死黎柏容兄爲余言笏書多有佳詩曾經點勘余止從人得

數首也

獨坐

寂坐蕭齋夜蟲聲滿戶庭月流千瓦白燈射半窗青隱恨悲風木高天負影形
久經霜氣肅葉落打空櫺

喜遇史六勝書

天風吹客到乍見轉驚疑握手情交愜談心淚暗垂音塵疎七載愁緒展雙眉
爲問攀龍客襟懷似昔時

自嘲二首

向來都未巧梳妝直到中年始自忙脂粉縱施人已厭還安樸拙似郵娘
盤針不似倒鬚鉤終日垂竿坐碧流一二寸魚難必得何言滄海釣鰲頭

莫秀才生芝四首

生芝字子厚獨山諸生幼隨其父猶人先生來郡學官父卒葬郡東青

田山遂家遵義子厚生而穎慧讀書不勞作詩文時時越流俗乃年未三十得弱疾以死稿先自焚遺者何粉韓香居其十八爲擇數首存之使其人見於茲集

春晚

鼉鼓寥寥闌六更當窗曙色未全明半醒半睡心中事旋合旋離夢裏情消息難憑千里雁寂寥最怕一聲鶯如今流滯邯鄲道悔把文章誤此身

都雲旅思

颼颼風剪旅魂驚一夜雕鏤百媚成紙上功名難問命道旁花草枉多情鷓鴣只切歸鄉夢杜宇偏來喚客聲畢竟自憐還自愧人生何苦太聰明

遊春遇雨感賦

分飛止爲稻梁謀拋擲光陰未肯休幾度遊絲牽別恨滿街微雨識春愁紅邊有客嗟迷路綠外何人獨倚樓忙殺依依隄畔柳東西搖曳送行舟

踏春寓懷

花作全身玉作相從無粉黛減容光踏春勉副良人意逐伴終慚時世妝刀剪
柳腰風透骨帶牽蓮步草生香柔心暗惜芳華老已覺霏紅逗夕陽

蕭秀才濃 一首

濃字露臯遵義諸生

夜誦

小閣臨高敞燈張竹樹虛半窗涼夜雨一卷古人書蛩語無催促蛙鳴有疾徐
物微猶自爾可使玩居諸

丁秀才步青 一首

步青字子雲綏陽諸生

自鎖江橋歸桂岡館

鳴鳩乳燕弄和風行過溪橋度梵宮二里垂楊歸徑綠一川芳草夕陽紅

張處士正鐸 八首

正鐸字古愚遵義人其性峭潔家有田園之饒一小試輒不就年二十
後始從余學詩與之言卽有悟惜早死向所質余者多奇闢之作死而
無子問其家不知也爲之撫然

述懷

登山采良玉入水探明珠彼志各有在豈可分賢愚人生貴適意未宜限其趨
讀書識理亂誦詩辨貞汙立身苟有得何往非良圖堪笑今之人斫樹而取烏

諺云斫樹捉
烏謂其執一

懷人

蟋蟀鳴我牀秋風吹我帷短燈半明滅流螢亂窗扉幽懷不成寐披衣步忘歸
倚樹驚宿鳥臨流登釣磯境寂水聲大月星影稀忽念同心友連年音信微久
欲寄尺素悵無鴻雁飛

書園壁

味在適人口何必事梁肉地在適人意何必詗修築止此跬步間已可悅心目
潺潺石瀉泉習習風弄竹山縱四圍青苔積一簾綠花常開四時日渾無三伏
嗟哉石季倫昏昏死金谷安得若吾輩現前莫不足酒熟拉朋飲飯餘看鳥宿
坐卽借松陰臥仍得莎禪境或與人同樂乃所獨所以陶淵明采采籬下菊

雨

一雨偶然足萬山無限青人聲沸田野鳥語絮園亭老圃發紅藥短籬開素馨
相看嬾呼屐終日倒吾甌

早起

覺眼驚窗曙披衣晨氣涼捲簾雙燕入呼僕一鶯幫古樹沒明月輕烟含白楊
小溪持酒榼去踏野田香

晚眺

山蟬不住近黃昏負手閒看倚刺門鴉帶夕陽飛遠渡牛馱牧子過前邨青山
作畫雲千縷紅葉題詩酒一尊世僻不知人世事東林月已上金盆

三十感懷

蘇公大集顏公字坐臥何曾一刻離匪我思存終不好於人性近敢言疲榮華
有定知非分志願難平媿學詩除却經巢門廣大無人不笑十分癡

晚望

目極郊原日暮時無邊秋態入幽思烟籠寒竹雨初過風送殘雲天欲隨野渡
白翻雙鷺下霜林紅壓一楓垂年光又近重陽節漠漠遙山憶所知

黎國子兆熙 五十八首

兆熙字仲咸號壽農國子監生仲咸爲余舅雪樓先生次子性純慤少
余四歲余讀書舅家時嘗授章句長乃名於師於鄙說猶墨守也自十
餘年來侍其尊人宦遊日多不常厥聚辛亥自滇歸乃向余學識字畫

夜從事於聲音文字之書甚力每旬日必一見見多所疑問而每問必益深擬別置段若膺注說文丹黃一過去年八月得之卽手觀紙裝冊冊甫就於十月初夜與諸弟臥談頃忽起行數步而厥余聞奔視已暝矣余所言人每厭聽有信從命又如此悲夫當九月擬編定斯集屬仲咸助仲咸笑曰苟有能詩者及今便死不勝於遲數十年死耶及死之前夕與其弟叔吉縱談詩因誇己好句遂自啓篋出所存稿曰野茶岡人學吟一冊示之旋曰冊卽存若處死後叔吉泣奉以呈曰非仲咸自出之皆不知有此稿也余素知仲咸酷慕漁洋山人詩偶坐次憶某詩及注命繙輒得亦不知悟入至是合觀諸作乃真能向漁洋喉下探息者卽選錄爲茲集殿至其一似自知必殿余茲集者則余究未之知也

擬五雜組四首

五雜組宮錦袍往復還灘中篙不得已手爬搔

五雜組杭城綫往復還南飛雁不得已寫貸券

五雜組蜀江羅往復還機中梭不得已雙鬢皤

五雜組鴛鴦枕往復還迴文錦不得已愁人飲

歸晚

薄暮跨驢歸歸向城東路落日隱青松寒烟在溪樹望望荷樵人依依入邨去

過張芝園

椿

學博寓

梅花開已闌殘英墮林塢爲訪幽人居遂造先生宇汲水論茶經餽蘭理琴譜
花翳東西窗書分甲乙部坐久日西斜聊復尋歸路春風何自來橋南綠芳杜

是日
正春

舟出黃牛峽誌喜

衆水匯瞿塘羣山亦奔赴東夾令東下一息不容駐前灘續後灘未到聲已懼
漩渦走雷霆劈溜裂雲霧一刻生死界萬牛挽不住吁嗟蜀江險慎避彼之怒

舟行近黃牛乃若失追捕翹首萬灘高不敢再回顧蒼茫烟水寬遙見西陵渡
宜都舟中望獬亭

朝發夷陵城暮見宜都樹獵獵半檣風扁舟似飛渡南望虎牙關北瞰獬亭路
相吞憶孫劉一憤無乃誤遺恨永安宮大業付庸孺丞相固云賢不壽亦天數
懷古思茫茫飛鴻正西去皓月上東山暮潮猶鬱怒

百里洲

日落江氣清潮生庾郎宅蒼然空靄間霜月照遠客遙遙燈火明星點上烟白
雁影渡平潭人聲聚荒澤渺渺江南思寒波澹焉碧

黃州月夜

停舟向空江江頭帶殘雪水波正蒼涼漁火半明滅烟中孤鶴飛林際冷蜚咽
遙見寒溪山微茫雲外列復得月華明依依倍親切

晚泊鯉魚料

落日渺何處暝然烟氣浮幽蛩鳴唧唧怪鳥聲啾啾遙見沙際火知有雲外舟
余懷淡無事隨地信淹留翹首九華山遠秀清兩眸

曉過淇上憶外兄鄭子行

堯

宿雨生新寒風縹新淥楊柳散晴烟淇水明如玉欲攜十斛螺寫此空中綠忽
憶山中人三載不相矚安得與之遊共醉猗猗曲

盆山

憶昨大姚時與汝共官廨頻以手摩挲玲瓏特可愛迢迢三千里持歸受顛拜
位置石盆中媵以兩石怪青松植其顛清水環其外稜峭蒼玉堅豁豁洞天隘
居然咫尺際峯峯爭向背苔痕暈纖碧崖影蓄深黛坐疑一拳石中有蓬島界
念汝來遐荒稜角未磨壞因思洱海雲更見點蒼態

巫山高

鑿山直到牽牛處巫雲盤盤踏蟾兔巖桂花生十二樓寒猿嘯入千年樹垂虹

飛吐帝臺紫燭龍無地升扶桑老鴉木魅攀霞出丁香筇竹吟清霜高唐夢醒
天雞曉下視虬松細於草碧桃子落花又開雲幘忽見瑤姬老蜀絃彈斷蜀山
高倒瀉銀潢工縹緲

巴東夜泊

臘日辭家長作客高歌獨對寒天碧獵獵江風吹破裘愁共波高一千尺牛口
灘頭霜月明秋風亭下暮濤生危檣夜泊巴東縣聽盡哀猿冷雁聲

宿遷項王祠

中歷逐鹿誰爲主叱咤風雲氣如虎蓋世英雄自有真諸人碌碌何堪數烏騅
一蹶失陰陵廣武雲深不復登美人名馬兩同盡豈信當時誤范增此中成敗
實天意雖渡江東復何濟恥學鴻門作遁歸豈恨關中屬劉季君不見錦衣夜
行良可哀千秋萬歲魂應來叢祠高枕長河上近接彭城戲馬臺

琴洲散人歌

琴洲之旁溪水深琴洲之上多竹林柴門稻隴在溪上閒來復作琴洲吟琴洲
長春草香琴洲窄秋月白不計春風秋月時此間合住烟霞客興來濯足臨溪
頭一條略約如橫舟環以碧玉清瀾瀾細石磊磊烟中浮鳬鷺啞啞隨沙鷗老
漁曬網簑簪收牧兒驅將烏犍牛短笛聲起歌相酬斜陽欲下仍句留洲兮洲
兮其吾儔我愛琴洲幽只覺琴洲好自作琴洲之散人他年大可中娛老君不
見唐時高士天隨子詩酒狂歌亦聊爾自作江湖舊散人扁舟長逐空明水

自茶汀冒雨行宿白沙驛

侵晨出門犯大霧倏上倏下踏山路山路盤盤雲氣昏居人不辨東西住一渠
流水鳴潺潺其來或自巖之間水聲雨聲兩爭鬭艱途九折愁迴環雲影塞山
深雨勢逼人覺黃昏著店紅飯熟一餐且飽征人腹君不見驛頭冰霏風肅肅
移家尚有孤兒哭

偕柏容兄從子元叔至鄭子尹先生宅觀荷

波含花影碧日艷酒鱗紅客興逸池上秋聲來葉中問奇思有識得句恨難工
漫許竹林友咸才愧阮公

曉發合江

月落征檣動微熹隱衆山濤聲趨鰓部霜氣拓烏蠻夢斷渾難續燈殘似尙閒
少岷峯下路惆悵客程艱

采石晚泊

停橈依采石水氣杳然空雲吐寒濤白江吞落日紅沉舟多歲月戰骨幾沙蟲
莫問興亡事長烟隱去鴻

觀音門遠眺

憑高瞻勝地滾滾大江橫風雨南朝寺烽烟北固城千秋留王氣終古走潮聲
天塹誰云險興亡幾駐兵

舟抵天津